

2 Tiq mod ser liq

Awg meh he lehq phehq peg che awg lawn

A.D. 62-63 khuhq thad huh Pawd loq Rod maq ve thawnr khuhn tuhaz vehr lehq yawd 4 pawz te pawz ha lehq che bon khuhd ca mar tod peg khaz nuhr, 1 Tiq mod ser he lehq Tid tuq liq haq yawd buhq lar che yaog. Kheh te lehq A.D. 66-67 awg yand awg khuhn Jawd mawd nux Ner ror uq penr che thad liz, Pawd loq haq su thawnr khuhn te pawz kawq yug ke vid che yaog. Thawnr yad te ghad heh te lehq gawg jad che mig kor thawnr khuhn son caz pheh lehq ke huh lar che haq te lehq, Pawd loq yawd ved awg ton liz awg ghad nud jad vehr che yaog. Pawd loq awr lehr yawd ved kanx lehd ma koz, yawd ved a saq lehd ma koz peg vehr tez chehd che haq yawd sir che yaog.

Buhq var he lehq buhq che awg yand

Liq phu che ve te koz awg khuhn ka nad nehax ted mag awg khuhn Pawd loq awr lehr buhq var yaog lehd koz lar che yaog. Kheh te lehq liq che ve khuhn kha koz chi lar che awg lawn teq pa khuhn liz, Pawd loq buhq cheawg lehz sax khiz khanr lar che yaog. 2 Tiq mod ser liq che ve haq A.D. 66 khuhq kheh thad huh khuhn buhq lar che yaog.

A yed ir che awg lawn he lehq awg lawn kha peg

Awg lawn che seh z ceng haq te lehq Pawd loq yawd Tiq mod ser haq liq che ve te koz buhq vid lar che yaog. (1) Pawd loq haq awg chawd teq pa chid bag lar haz lehq ni ma har jad che haq te lehq, Tiq mod ser haq har naq laor ghud vid chehd che yaog. (2) Jawd mawd nux Ner ror uq penr che huhx chehd lehq du deh che haq gha khanr chehd che Khreq yad awg mor teq pa awg pun Pawd loq duhd har duhd khix jad lehq Tiq mod ser haq ha lehq che bon khuhd haq kha sehax haq sax lehq, ha lehq che bon khuhd u ve awg pun gha tuq gha khanr cawd liz tuq khanr tug awg ghad pid che yaog. (3) Tiq mod ser haq cud lehq Ed fed suq Khreq yad awg mor haq liq buhq fe vid gad che yaog.

Awg lawn nux

1. Pawd loq Tiq mod ser awg pun duhd khix che (1:1-4)
2. Pawd loq yawd awg ton gha phud chehd che awg lawn (1:15-18)
3. Tiq mod ser haq sa tiq pid lehq tawd sanr vid che (2:1-26)
4. Awg leh med ve awg yand awg lawn sa tiq pid che (3:1-17)
5. Pawd loq tawd sanr lehq lawg khawx vid che he lehq laq kuhr cax che tawd (4:1-22)

Awg chawd haq duhd nuhd che tawd

¹⁻² Yer suq Khreq haq te lehq co ha gha teq che yaog lehd koz che kar tiq tawd khuhd awg lawn koz mar vid tug, Ghig sa ve a lor cawd che haq te

lehq Yer suq Khreq ve cuh yad* phehq che ngag Pawd loq awr lehr, ngag haq che yad† Tiq mod ser haq liq che buhq fea che yaog. Awr pa Ghig sa he lehq a nig ved Jawd mawd Yer suq Khreq ve awg bon awg sinx, har kax vix che ted ceng he lehq duhd sa gad sa che ted ceng nawg geh cawg vid-oq.

Yer suq awg pun sax khiz khanr tug mad yaq taw

³ Bon lawg che awg khuhn ngag nawg haq khar thad liz duhd nuhd lehq Ghig sa haq ngag chid muh che yaog. Ngag ved a pux a pi teq pa heh te lehq, daq che kehg che sir vix che ni ma cawg che awg khuhn yawd awg pun ngag liz kanx te che yaog.

⁴ Nawg ved mehz ghig yaq che haq ngag duhd nuhd che te yand, ni gha hax gha lia ngag nawg haq mawg gad chehd che yaog. Nawg haq gha mawg ver, ngag ha lehq che cawg mad-ag tug yaog.

⁵ Nawg ni ma awg tawg kha gag yonr che ted ceng haq ngag duhd nuhd che yaog. Nawg yonr che awr lehr, awg kawd thad nawg ved a pi Lawd iz he lehq nawg ved awr ye‡ Ud niq awg khuhn cawg lehq, a meha nawg awg khuhn lo liz cawg che haq ngag kha nehax sir che yaog.

⁶ Ta lend mehr. A mir toq tuag che heh, ngag nawg thang huh laq kuhr tar cheaq te lehq nawg

* **1:1-2 1:1** *cuh yad* Yer suq lez yug lehq cuh peha che chaw. Mk 6:30, 1K 1:1 † **1:1-2 1:1** *ngag haq che yad* Pawd loq bon mar vid lehq Khreq yad phehaq lar che te lehq che kheh koz che yaog. ‡ **1:5 1:5** *nawg ved awr ye* Tiq mod ser ve awr ye awr lehr Yud daq chaw phehq che yaog. Cy 16:1

cawg lar che Ghig sa ve laq sawnr haq nawg khar thad liz yehd don chehd-oq.

⁷ Awg lawn ghod ver, Ghig sa awr lehr a nig haq kuhz vix che ni ma pehar che ma hez. Kheh ma khuhd, kand pax cawg che ni ma, haq pehnd che ni ma he lehq a sug yawd awg ton haq ghad vix che ni ma yawd a nig haq pehar che yaog.

⁸ Kheh te lehq, a nig ved Jawd mawd Yer suq awg pun sax khiz khanr tug tad yaq taw. Yawd awg pun thawnr khuhn gha chehd che ngag haq te lehq liz tad yaq taw. Ghig sa ve kand pax haq yehd lehq, ha lehq che bon khuhd[§] awg pun gha tuq gha khanr che teq pa haq ngag geh teq geha khanr-oq.

⁹ Ghig sa awr lehr, a mig thad lo mig gig haq maq te phanr ser thad loar, yawd duhd lar che heh phehaq vid tug, yawd ved awg bon haq te lehq a nig haq thaer khuhq ax lehq,* daq kehg che haq te tug awg pun a nig haq kug yug lar che yaog. A nig kanx te che haq te lehq yawd pehar che ma hez. Yawd ved awg bon u ve awr lehr, Yer suq Khreq haq te lehq a nig haq pehar lar lehq,

¹⁰ A nig ved Thaer khuhq par Yer suq Khreq tuhaz che haq te lehq, a meha awg bon u ve haq a nig kha sehax gha mawg che yaog. Yawd awr lehr, suh che ted ceng haq te lug lehq, co ha teq che ted ceng he lehq mad lug ma sez vix che ted

§ 1:8 1:8 *ha lehq che bon khuhd* Yer suq haq yonr ver thaer khuhq che haq gha che haq koz che yaog. * 1:9 1:9 *thaer khuhq ax lehq* Ned haeg ve kand pax awg huhx lo pong ax che haq koz che yaog.

ceng haq, ha lehq che bon khuhd awg khuhn lo kha sehax tuhaz vid lar peg che yaog.

¹¹ Ha lehq che bon khuhd che awg pun bon mar par, cuh yad he lehq sar lar te tug, Ghig sa ngag haq lez yug ax che yaog.

¹² Kheh te cheaq te lehq, ngag che kheh gha tuq gha khanr che yaog. Kheh ma khuhd, ngag mad yaq taw. Awg lawn ghod ver, ngag yonr chehd che awg sehr phad haq ngag sir chehd che yaog. Ngag yawd haq kha chid aq vid lar che[†] teq pa, awg ni u ve teq ni kha gag[‡] yawd haq sax lar gha che yaog lehq ngag kha nehax sir chehd che yaog.

¹³ Yer suq Khreq haq caz daq che yonr che he lehq haq che ted ceng khuhn, nawg awr lehr, ngag geh gha kad lar che daq jad cawd jad che tawd khuhd teq pa haq kha nehax na yug lehq te kae-o.

¹⁴ A nig awg khuhn chehd chehd che Daq che kehg che Awg ha phu haq cud lehq nawg haq chid aq ax peg che[§] daq jad che awg ceng haq kha nehax haq sax laor.

¹⁵ Ar siq muhd mig^{*} khuhn chehd che chaw awg gha lia ngag haq chid bag lar haz vehr che lehq nawg sir che yaog. I hehd awg khuhn, Phur

[†] **1:12 1:12 kha chid aq vid lar che** Pawd loq ve awg ton, co ha, yawd te lar che kanx he lehq yawd mar gha lar che chaw teq pa haq koz che yaog. [‡] **1:12 1:12 u ve teq ni kha gag** Suhx jehg che awg ni haq koz che yaog. [§] **1:14 1:14 chid aq ax peg che** Bon khuhd mar che kanx haq koz che yaog. 1Ti 6:20
^{*} **1:15 1:15 Ar siq muhd mig** A meha Tu ra ki muhd mig haq koz che yaog.

ger luz he lehq Her rar mod genr liz chehd che yaog.

¹⁶ Awd ner sir phawd† ted yehg haq Jawd mawd Yer suq har kax che ted ceng cawg vid-oq. Awg lawn ghod ver, yawd ngag haq laex pawz duhd sa tug tea che yaog. Ngag son caz pheh lar che haq yawd mad yaq taw.

¹⁷ Yawd Rod maq med lo lag gag che te yand, ngag haq mawg thad kha gag hax ceh nux ca che yaog.

¹⁸ Yawd awr lehr, suhx jehg suhx taz che awg ni teq ni khuhn Jawd mawd Yer suq geh har kax che ted ceng haq gha tug, Jawd mawd Yer suq yawd haq har kax vid-oq. Ed fed suq med khuhn liz, yawd ngag haq khawd-ehg taw maq ga lar peg che awg lawn haq nawg kha nehax sir chehd che yaog.

2

Yer suq Khreq ve daq che maq yad

¹ Kheh te lehq, ngag yad-og, Yer suq Khreq ve awg bon khuhn awg ghad cawag vid-oq.

² Sax khiz khanr sehr phad* laex ghad mehz khuhd suhr nawg ngag geh gha kad lar peg che awg ceng teq pa, su haq mar vid pix che kar tiq yeg che chaw teq pa haq kawq chid aq vid-oq.

† **1:16 1:16 Awd ner sir phawd** Pawd loq bon ca tod mar thad yawd ved yehg awg khuhn jehd lehq mar che yaog. Liq che haq buhq chehd thad huh yawd suh vehr che haq sur che yaog. 1:18

* **2:2 2:2 Sax khiz khanr sehr phad** Pawd loq mar che bon khuhd gha kad lehq yonr che chaw teq pa haq koz che yaog. 1Ti 6:12

³ Yer suq Khreq ve daq che maq yad[†] heh te lehq, nawg ngag hehd geh teq geha tuq che khanr che haq khanr yuor.

⁴ Maq yad te chehd che chaw khar ve te ghad lehd ma koz, a sug yawd ved awg hox ni ma cawd tug te gad che haq te lehq, a sug yawd awg ton awg pun maq yad kanx ma hez che kanx teq pa awg khuhn kax tinr huhz tinr lar tug yawd maq te.

⁵ Cex daq che pawehd awg khuhn gehe che chaw te ghad awr lehr, awg lid awg khad cawg che heh maq cex ver, su yawd haq ghad sehr phad yaog lehz maq sawnr vid.

⁶ Kanx te nar che mig cad par awr lehr, awg sir haq awg kawd gha cad cawd che yaog.

⁷ Ngag koz chehd che haq duhd ngawx ser. Awg lawn ghod ver, Jawd mawd Ghig sa awr lehr, awg ceng gha lia che haq nawg sir vix tug cud yiq pehar tug yaog.

⁸ Ngag ha lehq che bon khuhd mar vid lar peg che heh, Dar viq ve awg ceng awg khad[‡] phehq che, suh kig lo kawq teq tuag peg che Yer suq Khreq haq duhd nuhd-oq.

⁹ Ha lehq che bon khuhd u ve haq te lehq, chaw haeg te ghad heh te lehq ngag haq su pheh teh lar lehq, tuq che khanr che haq ngag gha khanr che yaog. Kheh ma khuhd, Ghig sa ve tawd khuhd haq su pheh teh lar maq gha.

[†] **2:3 2:3 maq yad** Khreq yad awr lehr maq yad haq sur che awg lawn Pawd loq laex pawz koz che yaog. [‡] **2:8 2:8 Dar viq ve awg ceng awg khad** Yer suq awr lehr chaw yad phehq cehg mag che haq mar lar che yaog.

10 Che ve haq te lehq, Ghig sa lez yug lar che chaw[§] teq pa awg pun awg ceng gha lia haq ngag yeg khanr che yaog. I hehd liz Yer suq Khreq khuhn thaer khuhq che he lehq co co taer taer awg mig awg phond haq gha tug awg pun yaog.

11 Tawd che te khuhd awr lehr, kar tiq yeg che tawd khuhd phehq che yaog.

A nig yawd geh teq geha suh che* ver, yawd geh teq geha gha teq tug yaog.

12 A nig yeg khanr† ver, yawd geh teq geha gha uq penr tug yaog.

A nig yawd haq chid bag‡ ver, yawd liz a nig haq chid bag ax tug yaog.

13 A nig kar tiq mad yeg liz, yawd awr lehr kar tiq yeg chehd che yaog.

Awg lawn ghod ver, yawd awg ton haq yawd chid bag maq gha.

Ghig sa ni ma cawd che kanx te sehr phad

14 Awg lawn che teq pa i hehd haq kawq duhd nuhd vid-oq. Tawd khuhd teq pa awg lawn tawd maq gha ghawg daq tug, Ghig sa mehz khuhd suhr i hehd haq sa tiq pid-oq. Che kheh te tawd ghawg daq che awr lehr, teq chaweh awg bon mad cawg che awg khod-aq liz, kad sehr phad teq pa haq te lug vid che yaog.

§ **2:10 2:10 lez yug lar che chaw** Khreq yad teq pa haq koz gad che yaog. 2Pt 2:9 * **2:11 2:11 yawd geh teq geha suh che** Ni ma awg pir haq kuhz chid bag lar haz che haq koz che yaog. A kaz tur che awr lehr u kheh te che awg hez phehq che yaog. Rm 6:3-11 † **2:12 2:12 yeg khanr** Gha tuq khanr che liz ni ma mad lug che haq koz che yaog. Rm 8:17 ‡ **2:12 2:12 chid bag** Mt 10:33 haq ngawx.

15 Nawg awr lehr, Ghig sa ni ma cawd che kanx te par phehq tug, hax ceh nux cud cad lehq teo. Nawg awr lehr, yaq taw tug mad cawg lehq, awg cehg mag ve tawd khuhd haq thed ghad cawd ghad mar vid vix che kanx te par phehq tug yaog.

16 Ghig sa haq ma yawz yan che awg khuhn kheha koz gid che tawd khuhd teq pa haq jaw kae-o. Awg lawn ghod ver, chaw u ve teq pa awr lehr, Ghig sa haq ma yawz maq yan che ni ma ghaq te ghaq mad phehq vehr che yaog.

17 I hehd mar vid che teq pa awr lehr, kid che behg che khuh kig, ir veh kuhg veh che heh phehq che yaog. I hehd awg khuhn lo Hur mer nehd he lehq Phid lehq liz chehd che yaog.

18 Ix mag awr lehr, thed che cawd che ted ceng yawnd yaq veh lehq suh kig lo kawq teq tuag che ted ceng te gha vehor,[§] lehd koz che yaog. Chaw ted pehg pehar ve yonr che ni ma haq ix mag yug puhz vid chehd che yaog.

19 Kheh ma khuhd, Ghig sa ve yeg che awg cuhz penr awr lehr, khar thad liz yeg chehd lehq, cunr che kheh te dawz lar che yaog. †“Jawd mawd Ghig sa awr lehr, yawd ved chaw teq pa haq sir chehd che yaog.” Kheh te lehq, “Jawd mawd Ghig sa ve awg meh haq puhd chehd che chaw awg gha lia awr lehr, ma thed ma cawd che haq chid bag lar haz-oq,” lehz buhq lar che yaog.

20 Ir che yehg ted yehg awg khuhn phu khen

§ 2:18 2:18 *thed che cawd che ted ceng yawnd yaq veh lehq suh kig lo kawq teq tuag che ted ceng te gha vehor* Kawq teq tuag che awr lehr awg ton ma hez. Co ha haq lehax caz daq che, lehz ix mag mar chehd che yaog. † 2:19 2:19 Heh 16:5

si khen lehax cawg che ma hez. A suhz he lehq a jeq te lar che awg khen teq pa liz cawg che yaog. Awg khen ted pehg pehar haq awg mig awg phond cawg che awg pun yehd lehq, ted pehg pehar haq awg mig awg phond mad cawg che awg pun yehd che yaog.

²¹ Kheh te lehq, awg mig awg phond mad cawg che awg ceng teq pa haq a sug yawd awg ton khuhn yug chid bag ver, yawd awr lehr, daq che kanx awg gha lia haq te tug awg pun ghu lar hehd lar che, awg sehr phad yehd gha che, daq che kehg che he lehq awg mig awg phond cawg che awg khen phehq tug yaog.

²² Yad nehq teq pa awg suhr awg sar phawd awr sex lae vix che* awg ceng teq pa haq nawg jaw kae-o. Daq kehg che ni ma awg khuhn Jawd mawd Yer suq haq kug che chaw teq pa geh teq geha thed che cawd che awg ceng, yonr che awg ceng, haq pehd che awg ceng he lehq duhd sa gad sa che awg ceng teq pa haq hax ceh nux teo.

²³ Cud yiq mad cawg lehq teq chaweh cuhx kig mad cawg che awg lawn teq pa jehg daq che haq liz jaw kae-o. Awg lawn ghod ver, kheh te jehg daq che ted ceng awr lehr, tawd ghawg daq che ted ceng haq lehax te tuhaz che nawg sir chehd che yaog.

²⁴ Jawd mawd Ghig sa ve awg ceg teq pa awr lehr, ded daq yaq daq che chaw maq gha phehq. Yawd awr lehr, chaw awg gha lia haq ni ma nud

* **2:22 2:22 sex lae vix che** Ma hez hez che yonr khad haq na che, a sug yawd awg ton haq ma ghad che, Ghig sa haq haq che haq keh mig gig ha lehq tug haq haq che haq koz che yaog.

nehg che chaw, mar vid vix che chaw he lehq yeg kxanr vix che chaw gha phehq che yaog.

²⁵ Yawd haq tawr daq che chaw teq pa haq ni ma nud nehg che awg khuhn mar vid vix che chaw liz gha phehq che yaog. U kheh te ver, thed che cawd che ted ceng haq i hehd sir phehq tug, i hehd vend bax duhd phuhz tug Ghig sa te vid tug lehq nar maq sir.

²⁶ Kheh te lehq, ned haeg ve a lor haq te tug awg pun i hehd haq ned haeg pheh yug lar peg[†] liz, i hehd kawq sir lehq ned haeg ve va awg khuhn gha pong tug yaog.

3

Awg leh med ve awg ni awg hax teq pa

¹ Awg leh med ve awg ni* awg hax teq pa awg khuhn lo har jad che awg yand lag gag tug yaog leh sir lar-oq.

² Awg lawn ghod ver, chaw ted pehg awr lehr, a sug yawd awg ton haq lehax haq che chaw, phu haq sex lae che chaw, a sug yawd awg ton haq tar ir che chaw, caz mig vix che chaw, maq sawnr ma caz koz che chaw, awr pa awr ye khuhd maq na yug che chaw, su ved awg bon haq maq sir vix che chaw, mad daq mad kehq che chaw,

³ su haq mad haq vix che chaw, su ved vend bax haq ma phehd vid vix che chaw, su haq khaex vix che chaw, a sug yawd awg ton haq ma

[†] **2:26 2:26 ned haeg pheh yug lar peg** Ned haeg beg khuhd na lehq yaq kaw yaq vehr che haq koz che yaog. ^{*} **3:1 3:1 Awg leh med ve awg ni** Yer suq kawq yaq lag tug awg yand haq koz

che yaog.

ghad vix che chaw, haeg jad che chaw he lehq daq che haq cand che chaw phehq tug yaog.

⁴ I hehd awr lehr, su haq chid aq vid vix che chaw, su sa tiq pid che tawd khuhd haq maq na yug vix che chaw, ni ma ir jad che chaw he lehq Ghig sa haq mad haq lehq mig gig ha lehq tug teq pa haq haq che chaw phehq tug yaog.

⁵ I hehd awr lehr, Ghig sa haq yawz yan che awg lid awg khad teq pa haq kha sehax te liz, awg thang phawd awr lehax te lehq, awg cehg mag Ghig sa haq yawz yan che kand pax haq chid bag che chaw phehq tug yaog. U kheh te che chaw teq pa haq jaw kae-o.

⁶ I hehd awg khuhn chaw ted pehg pehar awr lehr, su ved yehg khuhn gehe lehq, cud yiq mad cawg che yad mid teq pa haq her ka yug gha che yaog. Yad mid u ve teq pa awr lehr, vend bax kha peh puhd lar lehq, awg suhr awg sar sex lae che laex ceng i hehd haq seh kae chehd che yaog.

⁷ Yad mid u ve teq pa awr lehr, khar thad liz su mar che khuhd haq na chehd liz, awg cehg mag ve tawd khuhd haq maq sir vix che yaog.

⁸ Yar ner he lehq Yar ber[†] teq pa Mod ser haq tawr tar che heh, chaw u ve teq pa liz awg cehg mag ve tawd khuhd haq tawr tar che yaog. I hehd sir vix che ni ma ted ceng lug vehr lehq, i hehd yonr che ted ceng awr lehr, awg cehg mag yonr che ted ceng ma hez.

⁹ I hehd awr lehr, awg ghud suhr kawq kae maq gha. Awg lawn ghod ver, chaw u ve ni ghad cud yiq mad cawg che awg lawn kha sehax saw

[†] **3:8 3:8 Yar ner he lehq Yar ber** Sax ban te vix che Ed jid tuq chaw yaog. Tuhz 7:11, 22

tuhaz che heh, chaw che teq pa cud yiq mad cawg che awg lawn liz, chaw awg gha lia mehzh khuhd suhr kha sehax saw tuhaz tug yaog.

¹⁰ Ngag mar vid che, ngag te che, ngag duhd law lar che, ngag yonr che, ngag duhd yehg gad yehg che, ngag haq pehnd che he lehq ngag ni ma yeg che, che teq pa haq nawg gha mawg gha sir lar peg che yaog.

¹¹ Anr tiz awr med, Ir kawd niq med he lehq Lud tar raq med[‡] teq pa awg khuhn su du deh che§ haq ngag gha khanr che heh, du deh che he lehq tuq che khanr che haq ngag khawd-ehg kheh gha khanr che haq liz nawg gha mawg gha sir lar peor. U ve awg gha lia awg khuhn Jawd mawd Yer suq ngag haq pong ax peg che yaog.

¹² Awg cehg mag koz ver, Yer suq Khreq awg khuhn Ghig sa haq yawz yan gad che chaw awg gha lia awr lehr, du deh che haq gha khanr tug yaog.

¹³ Haeg che chaw he lehq her ka vix che chaw teq pa awr lehr, sang te sang haeg tug yaog. I hehd su haq her ka lehq, su liz i hehd haq kawq her ka vid tug yaog.

¹⁴ Nawg awr lehr, nawg gha hend lehq kha nehax gha yonr lar che teq pa haq yeg chawa yug cid lar-oq. Nawg a sug geh gha hend lar peg

[‡] **3:11 3:11 Anr tiz awr med, Ir kawd niq med he lehq Lud tar raq med** Pawd loq bon mar lar haz che med teq pa phehq che yaog. Cy 13:14-52. Lud tar raz awr lehr Tiq mod ser pawag kig med phehq che yaog. Cy 14:6 § **3:11 3:11 du deh che** Cy 14:19-20 haq ngawx.

che haq* nawg sir chehd che yaog.

¹⁵ Kheh te lehq, nawg chaw yad nehax phehq thad liz† daq che kehg che Liq phu haq liz nawg sir chehd che yaog. Liq phu u ve awr lehr, Yer suq Khreq haq yonr che awg khuhn nawg thaer khuhq che haq gha tug cud yiq pehar gha che yaog.

¹⁶ Liq phu awg gha lia awr lehr, Ghig sa duhd pawnr vid cheaq te lehq cawag che yaog. Liq phu awr lehr, mar vid che, vend bax pheq mar vid che, kawq daq tug tea che he lehq thed che cawd che haq te tug mar vid che yaog. Che awg gha lia awg pun Liq phu awr lehr, awg bon cawg che yaog.

¹⁷ Kheh te cheaq te lehq, Ghig sa ve chaw awr lehr, peh lawq che chaw he lehq daq che kanx awg ceng gha lia awg pun ghu lar che chaw phehaq tug yaog.

4

Bon khuhd kha nehax mar vid-oq

¹ Ghig sa mehz khuhd suhr lehd ma koz, teq chehd che chaw teq pa he lehq suh vehr che chaw teq pa haq suhx jehg suhx taz tug Yer suq Khreq mehz khuhd suhr lehd ma koz, yawd kawq tuhaz tug he lehq yawd uq penr tug haq

* **3:14 3:14 a sug geh gha hend lar peg che haq** Tiq mod ser awr lehr Pawd loq geh lehd ma koz, yawd ved awr ye he lehq awr pi teq pa geh lehd ma koz gha hend lar che yaog. 1:5, 3:10 † **3:15 3:15 chaw yad nehax phehq thad liz** Yud daq chaw yad par nehax teq pa Yud daq chaw ve bon lawg kig khuhn Liq phu hend tug a khawag cawg che yaog. Cy 22:3

cud lehq ngag nawg haq tawd che kheh pehar che yaog.

² Bon khuhd kha nehax mar vid-oq. Har liz sa liz hax ceh nux te mar-og. Vend bax pheq mar vid lehq ded mar vid-oq. Duhd yehg gad yehg che he lehq mar vid che awg khuhn awg ghad pid-oq.

³ Awg lawn ghod ver, chaw yad teq pa awr lehr, daq lehq awg bon cawg che tawd khuhd haq maq na yug che awg yand cawag tug yaog. I hehd awr lehr a sug yawd ni ma cawd che heh kad gad lehq u kheh te mar che sar lar teq pa haq mad chawa i hehd geh chehd cuh vid lar tug yaog.

⁴ Awg cehg mag te che tawd khuhd haq maq gha na tug i hehd phuhz veh lehq kad phed kad lao khuhd haq kha sehax na tug yaog.

⁵ Nawg awr lehr, awg ceng gha lia awg khuhn ni ma tar vix che chaw phehq lehq sa tiq tar-oq. Tuq che khanr che haq khanr chehd-oq. Ha lehq che bon khuhd mar che kanx haq te chehd-oq. Nawg te chehd che bon kanx haq peh lawq thad kha gag teoq.

⁶ Awg lawn ghod ver, a meha liz tand tug* heh te tand vid chehd che haq ngag gha khanr lehq, ngag gha koeq che awg yand gag vehr pad ned che yaog.

⁷ Daq jad che bawz daq tug haq ngag bawz daq

* **4:6 4:6 tand tug** Yud daq chaw ve bon yehg nux khuhn tand tug tand vid che heh, Pawd loq ve a saq liz Ghig sa ve kanx awg pun tand vid lar che haq koz che yaog.

peor.† Cex tehz daq che ted ceng haq awg leh med kha gag ngag cex peor. Yonr che ted ceng haq ngag kha nehax yug cid lar peor.

⁸ A meha awr lehr, thed che cawd che si ux cuhr ngag awg pun haq sax lar che yaog. Awg ni u ve‡ awg khuhn thed che cawd che suhx jehg sehr phad Jawd mawd Yer suq awr lehr, si ux cuhr u ve ngag haq pehar tug yaog. Ngag haq lehax ma hez. Yawd kawq tuhaz tug haq duhd law chehd che chaw awg gha lia haq liz yawd pid tug yaog.

Pawd loq Tiq mod ser haq cuh che teq pa

⁹ Nawg ngag geh har naq lag gha tug cud cad-oq.

¹⁰ Awg lawn ghod ver, Der maz§ awr lehr, mig gig haq haq che haq te lehq, ngag haq chid bag lar haz lehq, Thed sar lawd niq med lo veh vehor. Kar rer ker awr lehr, Gar lar tiq muhd mig lo kae lehq, Tid tuq awr lehr Dar lar mar tiq* muhd mig lo kae che yaog.

¹¹ Lud kar te ghad lehax ngag geh chehd chehd che yaog. Nawg lag che te yand, Mar koq† haq liz sir vaha lar-og. Awg lawn ghod ver, kanx te

† **4:7 4:7 ngag bawz daq peor** Ghig sa te cuha che kanx haq Pawd loq yawd kar tiq yeg che awg khuhn te lar peor, lehd koz gad che yaog. ‡ **4:8 4:8 Awg ni u ve** Yer suq kawq yaq che awg ni haq koz che yaog. § **4:10 4:10 Der maz** Kaw 4:14 haq ngawx. * **4:10 4:10 Dar lar mar tiq** A meha Ar bed ni-ad lehd koz kug che yaog. Te pawz pawz ax ver Id lud riq lehd liz koz che yaog. Rm 15:19 † **4:11 4:11 Mar koq** Yod hanr Mar koq haq koz che yaog. Cy 12:12, 13:13

che awg khuhn yawd ngag haq kha nehax ga gha che yaog.

¹² Tud khiq‡ haq Ed fed suq med lo ngag kae pe che yaog.

¹³ Nawg lag thad ver, Tar rod aq med khuhn Kar puz geh ngag teh lar haz che a poq lehq maq he lehq liq teq pa loar lex lehq sar gig kox haq§ buhq lar che liq teq pa ga yug vеха lar-og.

¹⁴ Cag lex var Ar ler sar duq* awr lehr, ngag haq nar tug laex ceng tea che yaog. Yawd te che kanx teq pa haq kenr daq che heh Jawd mawd Yer suq yawd haq kawq te khuhq vid tug yaog.

¹⁵ Nawg liz yawd haq sa tiq teo. Awg lawn ghod ver, ngag hehd mar che tawd khuhd haq yawd hax ceh nux tawr tar che yaog.

¹⁶ Ngag awg ton awg pun ngag awg kawd te pawz gha yaw khuhq che te yand, chaw te ghad-e liz ngag phawd awr ma chehd. Chaw awg gha lia ngag haq chid bag vehr che yaog. I hehd teq pa haq vend bax taq tar vid-oq.

¹⁷ Chaw awg gha lia ngag haq chid bag lar haz liz, ngag awr lehr bon khuhd kha nehax mar vid lehq, bid saz a naz chaw awg gha lia gha kad tug, Jawd mawd Yer suq ngag geh chehd lehq awg ghad pehar che yaog. Kheh te lehq, lad cag six ve mawq kaw† awg khuhn ngag haq pong ax

‡ **4:12 4:12 Tud khiq** Cy 20:4, Ef 6:21-22, Kaw 4:7-8 § **4:13 4:13 sar gig kox haq** U thad teq coaq, Ghig sa ve tawd khuhd sar gig kox haq buhq lar che yaog. * **4:14 4:14 Ar ler sar duq** 1Ti 1:20 haq ngawx. † **4:17 4:17 lad cag six ve mawq kaw** Cir yanr che haq koz gad che yaog. Awg yand u ve awg khuhn, vend bax cawg che chaw haq lad cag six cheq cad cuh vid che awg lid cawg che yaog.

che yaog.

¹⁸ Jawd mawd Yer suq awr lehr, haeg che teq pa awg khuhn ngag haq pong ax che awg khod-aq liz, yawd ved muhd nuh maq muhd mig kha gag ngag haq thaer khuhq ax tug yaog. Yawd haq co co taer taer chid ir chid muh vid-oq. A meng.

Awg leh med ve tawd khuhd

¹⁹ Pid kid laq he lehq Ar kud laq haq lehd ma koz, Awd ner sir phawd ve yehg yad ka yad teq pa haq lehd ma koz, ngag duhd nuhd chehd che yaog leh z i hehd haq koz vid-oq.

²⁰ Ed rar tuz awr lehr, Kawd ren thuq med lo chehd lar haz che yaog. Tar rud pheq te ghad awr lehr, nag lehq, ngag yawd haq Mer ler tuz med khuhn lo teh lar haz che yaog.

²¹ Muhd kaz yand mad gag ser huh nawg har naq lag gag tug cud cad-oq. Ud bud luq, Pud de, Lid nuq, Kar lawd duq he lehq a vix a nax awg gha lia nawg haq duhd nuhd chehd che yaog leh z tawd sanr fea che yaog.

²² Jawd mawd Ghig sa awr lehr, nawg geh chehd vid-oq. Ghig sa awg bon awg sinx liz nawg geh cawg vid-oq.

Lahu Shi
Lahu Shi: Lad hur Si Liq Phu Awg Suhx New
Testament

copyright © 2015 Wycliffe Bible Translators, Inc.

Language: Lahu Si

Contributor: Wycliffe Bible Translators, Inc.

All rights reserved.

2025-05-10

PDF generated using Haiola and XeLaTeX on 9 May 2025 from source files
dated 10 May 2025

e3f23237-3165-58f9-84d8-20fb5acd84fe